



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :

f Tir Yimym

ig tiryimym@aolima

yt tir yimym

TAPAK 8

Paraguay election nung  
Santiago Pena-i takok angu

Asian Medal dang nungi ochi obendang  
tongtibangba: Bajrang Punia

VOL. XX NO. 199 (ADOK 199) DIMAPUR SANGTENNÜ (TUESDAY)

MONUPII (MAY) 02, 2023

₹ 5.00

## Ao Senden-i ayongba Moatsü benjong meraketa tenzükogo



Ar atsütepba



Süngkumi tutepba

**Mokokchung, May 1, 2023 (TYO):** Nagaland sorkar den külem sür Ao Senden-i ayongzüka Moatsü benjong May 1, 2023 nü yangi Imkongmeren Sports Complex, Mokokchung nung amung tenzükogo. Iba sentong ya May 3, 2023 tashi agiyonga aotsü renema lir.

Tanü Moatsü benjong lapokba sentong nung tejaoker khudong, Advisor for Water Resources Tongpang Ozüküm liasü, saka pa ajungbena sorkar mapa kar adokba ajanga medentet. Aji süaka, Ao kini moa pa melena Arkakong MLA Nuklutoshi arua renema akaba sentong ajak tobur junga aser meraketa agia liasü.

Tanü MLA Nuklutoshi-i jembidang, akhi asen tsüraburtemi iba ama benjong balala munga nütsüing nüburtem tali putepshia lungjema libalirua aru. Aji saka, tanü Ao kini sobaliba tera ama-a aor ama aser temulung magütsüba ajiteter, ta temulung shirangba olen ka lemsatep.

Tanü Ao kin repringdangra lenla aüsü nung tajemrepba tia kati meneper ama, yimden tsütsü süshia, rongsenkettsüing aser sorkar tenzüküba wadang balala nung langzüingi alur ama ajiteter.

Anungji, "Aor khen meyipa repringshidi aser ochi mulung agi asentenshitsü mapang tongogo", ta pai tayongzüka ka agütsü.

"Taoba mapang asen tsürabur koda akhümketa aser kümdanga libalirua aru, khen meyipa repringshidi aser kati ka den putepa aser meimtepdi", ta pai ayongzüik. "Meimchir dak tashi mait ji lir, asen Aorbo tashi maitji dang ajia kati ka maitsütepi koba nung tajung lir, iba nungji asenok khen odi", ta paisa shisem.

Taoba hopta Aor legislator 11 ajurutepa nungsem ka akadang parnok lungjema alitsü asoshi bangzüing renemogo, anungji, Aor ajak lungjema alitsü asoshi paisa ayongzüik. Aor legislator-tem lungjemtsü bangjemogo, anungji, Ao Senden-i anir Ao kin lungjemtsü asoshi inyaktüsü, ta paisa shisem.

Tanü Mokokchung district nung Assembly Constituency 10 aliba ya nütsüing yongsük mali sür merumerua yangluba ama tangari jembir, saka iba ya taoba asen lenirtemi merumerua yangluba masü saka iba mapangjibo nütsüing yongsük agi tonga liasü aser shitak nung lezmüküba lir. Anungji, tanga Naga kin den

jilajitepdang asen temeten jembitettsüla, ta paisa ashi.

Tanü nütsüing yongsük ajema akümba ya kuli kar lir, 2011 nung asenoki zübazüba toksüba ajanga shitakba nütsüing yongsük aliba ama mesüi ajema aküm. Asenok zübazülema aliba den political tsütsü asenok kati ka arishitepdang, nütsüing meyi aika katitok, ta paisa kuli kar bener arua lemsatep.

Iba den asenoki aluyimba mapatem toa toksü aser rongsenkettsüing kuli balala ajanga lenten lima aser tanga yimitem bushia oatok. Pei tepok sünga alitsü aser tashikang tenteta aotsü atema pakshi. Anungji, asen lima rongsenkettsüing renloksü atemajia bilemdangtsüla, ta paisa shisem.

Asen jakdang election tonga aruji Naga nung rongdak nungdak to amatok. Govt. of India terata nung lir, kechiyong Naga nungeri election aginür asü solution aginür parnok i mejangjar aser parnok bangtepteper, aser aji tangari masü asenoki mangmandaktsür, ta pai ashi.

"Nüchiso angutsüba Naga nungeri temeten lir, saka asenoki mamatsüba kaji asenok ya India

union kübok lir ta metettsüla, anungji, GoI den tangatettep nung Naga yimden tebilemtsü atema ya inyaktüsü. Tarutsü Naga nungeri tia atema asenoki kechiba mebilemdanger", ta paisa asüingdanga ashi.

NSCN IM-i wako aser temzüing balaka atema noktakbajia tim dang aser Naga nungeri ajaki aji nungiter, saka asenok ya India union kübok alinung par den angatettepa aotsüba kanga dang nungdaker. Tip külen ano, NNPGs-i 'Agreed Position' agir yua alibajia kolen yutsür?, ta paisa asüingdanga ashi.

Anungji, "NNPGs telokjia odang toksütsüba telok ka masü. Parnoka lia aotsü asoshi taküm chiyungtsü nungdaktsü. Süra parnokji koba jenjang nung yutsür? Parnoki asenok dang aser nüburtem dang sabisarutsü, aser parnok dak temeten lir, anungji, ibaji asenoki bilemdangtsüla, parnokjia langkabosa renema yutsütsüla", ta paisa shisem.

Joko telungpur telok (faction) 16-18 akümer, parnokji kong aser shiba dang meshia chiyungtsü? Nübur dang sarutsüba dang. NNPGs-i

renemba asenok dang shiogo aser sayuogo, anungji, ibajia nungittsüla aser renema jembirji parnok atema-a telemetba kabo agütsütsüla masü na, ta paisa tebilemba ka lemsatep.

Tanü iba sentong nung D.C Mokokchung, Shashank Pratap Singh IAS-i moatsü salem lemsatep. Tir Yimym osang zülur, Sashimeren iba sentong nung menden liasü. Tongror Luden züingsem, R. Ayim Longkumer-i tarurtem pela-a agizüküba o jembir. Jangpetkobng Senso Telungjem Mokokchung Town ajanga sobaliba ken kar tena tesentepertem ayongzüik.

Mokokchung town Interward lisopur asaya tetoktepba ka liasü. Süngküm-i tutepba tetoktepba nung Alempang Ward nungi - Pamo mezüingbuba aser Kümlong Ward nungi - Talikabai tanabuba jenjang angu. Jui asemtepba nung Alempang nungisa Pamo mezüingbuba agizükü aser Yimyu ward nungi Tiawati tanabuba jenjang nung liasü. May 2 nü Ar atsütepba mezüing semi-final teburtem Alempang o Mongsenbai na aser tanabuba semi-final Salangtem o Sungkomen na atsüteptsü. Tetsürtem mezüing semifinal Artang o Sangtemla aser tanabuba semifinal Alongmen o Alempang na atsüteptsü.

May 2 Yatinü sentong nung Nagaland Chief Minister, Neiphiu Rio tejaoker khudong asütsü jaoka lir. Iba sentong nung Chakhesang Public Organization tir - Vezuhu Keyho, Chang Khulie Setshang tir - Nunganglemba aser Sumi Hoho tir - Nikheto Zhimomi parnokia shilem agitsü.

## Lotha Hoho-i Oil Exploration magizüker

**Dimapur, May 1, 2023 (TYO):** November 20, 2018 nü Nagaland sorkar den Memorandum of Understanding nung sign sütepa aliba ama Nagaland Petroleum & Natural Gas (NP&NG) Regulations and Rules 2012 (RR 2012) meyanglushi tashi Lotha nungeri lushi nung oil and gas exploration noktangtsü ta Lotha Hoho-i metetdaksüogo.

State sorkari Gauhati High Court indang Kohima Bench nung Suo Motu public interest litigation (PIL) atsülangtsü meranger. Lotha Hoho-i angatetteptsü atema PIL meyipa agia liasü.

NP&NG RR 2012 yanglushiba ya Lotha nungeri atema dang masü saka sendaktepa alir ajak atema tajangzüik lir ta Lotha Hoho-isa ashi.

Külen, Naga Hoho aser ENPO-i alir kiburtem nungi No Objection Certificate agütsütsü ta ashiba atema rathe kechiyong sendaktepa malir kati kodaser NOC agütsütsü. Ano, ali kiburtem nem Revenue dak alaka Royalty payment agütsütsü kecha shia

mali aser iba ajanga ali kiburtem tajangzüik kecha maliba sayur ta Lotha Hoho-isa ashi.

Petroleum and natural gas ama ali rongsen mamshiba nung takoksa lir ta angatetba agi PIL agien saka Nagaland sorkari pei meyong ali rongsen indang tajangzüik maginüba angundang kanga aoksar, ta Lotha Hoho-isa metetdaksü.

Neiphiu Rio-i sendaktepa alirtem den masü saka Assam CM Dr Himanta Biswa Sarma den Disputed Area Belt (DAB) nung oil exploration tenzükütsü ta ashiba magizüker. DAB ya Assam nung masü saka Nagaland nung dang lir. Ano British sorkari Nagaland indang Reserved forests aika Assam nem ketdangtsütsü atema agüja lir anungji itemjia Disputed Areas lir, ta parnokisa ashi.

Nagaland state akümba mapang Assam nung Sibsagar, Nowgong aser Lakhimpur jilatam ya arrtsü ama züingok anungji item jila ya state ana tsüingda permanent constitutional boundary ta züingshitsüla ta Lotha Hoho-isa ashi.

## North Eastern Water Management Authority tentettsü: Jal Shakti Minister

**Dimapur, May 1, 2023 (Agencies):** Parliament-i mulunga agizüküba sülen Northeast atema water resource management telok ka tentettsü ta Jal Shakti Minister Gajendra Singh Shekhawat-i ashi.

Iba ajanga state tem aser Centre tsüingda amalitepa tzü dak sendakba maparen inyaktü ta pai ashi.

"North Eastern Water

Management Authority tentettsü shidangogo. Iba ya state temi mulungtepba sülen lemtet aser Union cabinet dangi yokogo" ta Shekhawat-i ashi.

Taruba Parliament session nung Authority mulung agizükütsü ta ni amanger. Northeast state tem nung tzü talila mesüra kanga ajemba khurettem lir, ta paisa ashi.

Hombarnü Shekhawat-i

Brahmaputra Board indang 12 buba High Powered Review Board Meeting menden ser agia liasü.

Northeast kübok yimtsüingtem nung Jal Jeevan Mission (JJM) mapa kanga junga inyakdar. Assam nung 1% coverage nungi tenzüküba tang 50% tongogo. 2024 tashi nung onoki 100% coverage asütsü imlar, ta Shekhawat-isa ashi.

## Nagaland Police-i Mobile Forensic Investigation Van tenzüküker

**Kohima, May 1, 2023 (TYO):** Nagaland nung tang mezüing atema Mobile Forensic Investigation Van (MFIV) asem tezüikogo aser iba ya Forensic Science Laboratory Dimapur den sendakteptsü.

Hombarnü Police Headquarter Kohima nung Director General of Police (DGP) Nagaland Rupin Sharma den Additional DGP R P Kikon nati MFIV asem sayatsüogo.

"Nagaland kübok Dimapur nung forensic lab tila ka lir aser MFIV tenzüküba ya state police indang forensic maparen tajungba akümtsü atema lir" ta DGP Rupin Sharma-i ashi.

"Nagaland nung khuret

ajurubaji kits peria maliba lir aser iba ya forensic investigation nung amshiba powder peria manguba ajanga lir" ta pai ashi.

Senotsü peria melezmüküka Nagaland state police-i investigating units ajak nungi data bendener aser iba ya sorkar dang nungi forensics atema senotsü talila meshitsü atema lir, DGP-isa ashi.

MFIV ajanga District Executive Force tajungba akümtsü. Centre aser state sorkartemi maneni Nagaland Police indang forensic maparen tajungba akümtsü atema teyari agütsütsü imlar, ta Rupin Sharma-isa metetdaksü.

Police Modernization Schemes 2021-22 kübok mobile forensic vans ya shilem ka lir aser iba ya Ministry of Home Affairs kübok lir, ta DIG (Planning & Development) Jatila Jamir-ia ashi.

MFIV nung crime scene investigating kits enoka lir aser itemji finger print, latent finger print development, foot & tire print casting, forensic light source, blood detection, semen detection, evidence packing & collection, DNA collection & sexual assault kit amala lir, ta laisa metetdaksü.

MFIV ya Forensic Science Laboratory Dimapur den sendakteptsü ta DIG Jatila-isa ashi.

# Food & Civil Supplies Department-i Advisor den senden amen



Food & Civil Supplies Department-i Advisor den senden amenba noksa nung angur.

**Dimapur, Monupii/May 01 (TYO):** Food & Civil Supplies, Nagaland aser Advisor, F&CS & LMCP Govt. of Nagaland, K.T.Sukhalu, IAS (Rtd) tsingta departmental meeting ka May 1, 2023 anungdang 11:00 ako nungi Directorate of Food & Civil Supplies, Dimapur nung mena liasü. Iba senden nung menden Chubasangla Anar, IAS, Commissioner & Secretary to the Govt. of Nagaland, F&CS & LMCP

liasü. Senden nung V. Lovitoly Sema, NCS, Director, F&CS, Nagaland ajanga tarur pela agizükba o jembi aser Dr. Kapenlo Thong, Deputy Director, F&CS, Nagaland ajanga department inyakym indang osang agüja liasü. Iba senden nung department inyakym balala indang jembi aser Advisor Sukhalu-i department ketdangsür ajanga dang nübör ajungtsü asoshi akok

tashi tajungtiba nung inyaktsü ayongzüka liasü. Iba senden nung Fair Price Shops aser Transportation costs amala onüktem süoka jembia liasü. Advisor-ia district tasentem ajunga nung staff peria yoktsüba indang onük benoka liasü. Senden tembanga I.Anungba Sanglir, Joint Director, F&CS, Nagaland ajanga melepzüng o jembia liasü.

# DGC tesayur Khrienuo Angami den tepila sentong agi

**Dimapur, Monupii/May 01 (TYO):** Dimapur Government College (DGC) ajanga Associate Professor nungi anisüngzüksang aser taoba Head of Department, Political Science, Khrienuo Angami den tepila sentong ka April 29, 2023 nü agia liasü. Khrienuo Angami ya college nung jenjang balala nung küm 28 tashi tenzüka liasü. Iba sentong nung menden Purtila, Assoc. Professor, Department of Political Science liasü aser Dr. Vinyuhu Lhoungu, Asst. Department of Economics ajanga sarasademer sentong tenzüik. Principal, Prof. Sanjay Sharma-i iba sentong nung jembidang Khrienuo Angami-i Political Science Department aser college renloktsü atema temolung agüja aser bendanga

agütsür inyakba indang lemsatepa liasü. Lai college nung aliba tongtipang committee ana, Students Welfare Committee aser Students Advisory Committee nung shilem agiba atema pelaba lemsatep aser ano college nung Green Garden Area yangluba atema pelaba shia liasü. College indang Vice Principal, Dimapur Government College Teachers Association (DGCTA) Vice President, tesayurtem aser Dimapur Government College Students Council nungi jembidang la ya sempet balala aliba, ochishiba, asayamenü sempet aliba, jeretperet aser meranga inyakba tesayur ka liasü, ta ashi. College aser kaketshir ajungtsü asoshi lai shilem tajung

agiba bilemteta la dang pelaba metetdaksü aser lai tsüngsü tajung yutsür aor, ta shia liasü. Department of Political Science ajanga la atema renemtsüba slide show balaka sayu aser sentong nung temeja ken ana tashi tena liasü. Lai tepila o jembidang lokti dak pelaba lemsatep aser la iba college aser yangji alir ajunga den tenük agi manguba tesendaktep yangertetogo, ta ashi. Lai college nung inyakdang ajangshibatem bilemteta itemji la molung nung teti alitsü, ta ashi. Dr. Hannah Tia, Asst. Professor, Department of Sociology ajanga sentong tembanga sarasadem aser college asoshi tatembang mapa inyaktsür ama lai Green Garden Area nung süngdong ka temokja liasü.

# Kohima nung Job Fair sentong agiogo



**Dimapur, Monupii/May 01 (TYO):** State nung mapa manguba tebilemtsü kanga keraa tukuba akumba nungi ajemdaksütsü nikjindong nung Director, Employment, Skill Development & Entrepreneurship Nagaland, Kohima & Project Director, NCSC for SC/ST Kohima, Nagaland; Regional Employment Officer, (Model Career Centre Kohima) aser

Sub Regional Employment Officer, National Career Service Centre for SC/STs, Kohima, Nagaland lungjemer April 29, 2023 nü Director, Employment, Skill Development & Entrepreneurship Nagaland, Kohima indang office complex nung April 2023 Job Fair sentong ayongzüka liasü. Iba sentong ya anepdang 10:00 ako nungi nikongdang 4:00 ako tashi agia liasü. Sentong ya

Kovi Meyase, Additional Secretary & Ex-Officio Director of SD&E, Government of Nagaland & Project Director, NCSC for SC/ST Kohima, Nagaland ajanga lapoktsü. Iba Job Fair nung mapa agütsür telok pongu nungi arua shilem agi, kong mapa bushir nisung 252 arua liasü. Parok rongnung ano maneni interview agitsü atema candidate 52 shimteta liasü.

# TEPELA TASOBA ANOGO

**TENÜNG : TEKALEPEN JAMIR**  
 Talidak : L/W  
 Mangkolemba  
 Anogo : 2 May  
 Küm : 80



Tsüngremi arishi talang anema toktsüba tepela tulu Tsüngrem tenüng sanga kinunger, adianü aser medemsortem ajak den tasoba anogo tepela lemsateper. Maneni temeim Tsüngremi arishi talang anema aliba moajang ta sarasadema temoatsü meshitsür.

"Happy Birthday"  
 ~ Temeim kinungtsü, Chirnurtem aser Semchirtem

# KMC-i trade licence reprangshim tenzükogo

**Kohima, Monupii/May 01 (TYO):** Kohima Municipal Council (KMC) kübok business establishments/institutions ajak dang KMC ajanga 'intensive trade licence inspection' maparen May 1, 2023 nungi tenzükogo ta sangdong ka ajanga ashi. Iba dak sendakba nung ajaki ketdangsür den tashi angatepta yariteptsü ayongzüker aser

KMC ketdangsür ama masüba nisungtem nungi kumzüksü asoshi KMC indang Identity Card (ID) meshitsüla, senchi ajak receipt ajanga agütsütsüla aser metetnüba/ashishitsü kar lira KMC dangi tsüngdong arutsüla mesüra kmcnagaland@gmail.in nung email asütsüla, ta KMC administrator T. Lanusenla Longkumer-i sangdong ka nung ashi.

# ANTA HQ Kohima ajanga metetdaksür

**Kohima, Monupii/May 01 (TYO):** All Nagaland Taxi Association (ANTA) HQ Kohima ajanga ANTA HQ Kohima unit züngsem, tetetzü kibur aser driver tem dang sangdong ka nung ashiba agi, ANTA HQ Kohima züngsem chirtem HSLC aser HSSLC 2023 nung Top 20, Subject Toppers aser 1st Div angurtem

nem tenüngsang agütsütsü. Anungji züngsem temi ANTA ID Card aser Registration slip den pei tanur indang mark sheet tem ANTA HQ Kohima Office nem agütsütsü mepishir, ta sangdong ajanga ashi. Result sangdonger anogo 15 tsüngta mark sheet ya agütsütsüla, ta sangdong ajangasa ashi.

# NPCC tiri Moatsü benjong salem lemsatep

**Dimapur, Monupii/May 01 (TYO):** Aor ajak dangi Moatsü benjong salem abener, ta Nagaland Pradesh Congress Committee tir, S Supongmeren Jamir-i sangdong ka nung ashi. Alu nung meranga inyaka metsü yokba tembangba temaitsü iba benjong ya amunger aser iba mapang pelatepa ken tenteper, achi-

ajemer. Iba mapang Tulusang Tsüngremi kintem nem alu junga arutsü asoshi moatsütsü imla atar, ta pai ashi. Moatsü mapang asenoki asen sobaliba lepa repranger aser tajungtiba nung sayur. Ibai yimjung, tesunep, teyaritep aser kati ka taoba ta bilemba mapang ka südakjang ta sarasademtsür, ta NPCC tirisasa ashi.

# Friends of 80+ pur 18 buba Foundation Day mungogo

**Kohima, Monupii/May 01(TYO):** Friends of 80Plus Kohima Village pur April 30, 2023 nü 18 buba Foundation Day munga Kohima Village aser Tsiera Mechüki, Lhisemia Khel, Kohima Village nung Gorkha nung arishi küm 80 nungi 89 tsüngta alirtem nem akum tetushi agüja liasü.

asoshi toll-free number 14567 lir ta ashi aser Ministry of Social Welfare & Justice aser Social Welfare Department, Nagaland ajanga teintet rogotem atema facility balala agütsüba indang lemsatepa liasü.

Iba sentong nung jembidang Kohima Village Council indang chairman, Helievio Solo-i arishi küm 80 nungi 89 tsüngta nisung tain 182 anema alitsü moatsü aser ano parnok yimtsüng aser lanu putu asoshi temoatsü kaka süjang ta moaja liasü. Iba sentong nung Solo-isa nungo kaket ka sayaja liasü. National Helpline for Senior Citizens (NHSC) indang Programme Manager, Neithonuo Liegise-i iba sentong nung jembidang teintet rogotem

Iba sentong nung Inspector General, Assam Rifles, Maj Gen Vikash Lakhera aser L. Khel Council chairman Ayie Yhome nungera dena liasü. Sentong nung menden Medozhazo Rutsa liasü aser Associate Pastor, Baptist Revival Church Kohima, Thinuohelie Sachü ajanga sarasadema sentong tenzüik aser Pfuchazhünuo ajanga sobaliba ken ka agi telok ayongzüka liasü. Kasa sentong nung Kohima Village nungi doctor temi teitet rogotem nem angati health camp ka ayongzüka liasü.

# India atema China yabo category balaka nung lir: S. Jaishankar

New Delhi, May 01 (Agencies): Hombarnü External Affairs Minister, S Jaishankar-i, India nunger tanga linük balala den tesendaktep lir aser tejakleni odar, ajisüaka India atema China yabo category balaka nung lir, ta metetdaksü.

tesendaktepji jangramatem," ta metetdaksü.

"Ibaji parnokki arrtsü dak sendakba tezüngzüktep alema inyakba ajanga lir," ta pai ashi.

"India atema kidanger linüktemji kanga tongtibang. Linük uluba aser rongsenkettzüng tashi nung ajemdaker ajak tajangzük angutsü mechi nung India-i kidanger linük tilatem den amalitepa inyaker," ta External Affairs Minister-isa metetdaksü.

"Tesüiba küm ter tsüngda Ato kilonser Modi lenisüba kübok yamaji inyaka arudar aser onok region dang ya Neighborhood First Policy ta ajar," ta pai ashi.

# PM-i pa indang masü saka Karnatakaatemajembitsüla:Rahul Gandhi



May 01, 2023 nü Tumkur district nung Congress lenir, Rahul Gandhi-i election nüboyim sentong ka nung jembidang tangokba noksa nung angur. Karnataka nung Assembly elections May 10 nü agitsü aser May 13 nü vote azüngtsü.

**Turuvekere (Karnataka), May 01 (Agencies):** Hombarnü Congress lenir, Rahul Gandhi-i, Narendra Modi-i Karnataka election ya pa atema masü ta angatetsüla, ta ashi.

lenirtem tenüng tetshir. Na (Modi) yagi arur saka ner Chief Minister (Basavaraj Bommai) aser (taoba CM) B S Yediyurappa nunger tenüng nai metetshir. Nai (Modi) jembiba onük ajakji Narendra Modi indang ang lir," ta ashi.

Tumakuru district (Karnataka) nung election nüboyim sentong ka nung jembidang Rahul-i, Ato kilonseri pa indang jembitsü agibo Karnataka nung BJP sorkari inyakba mapatem aser tarutsü sentongtem indang ang jembitsüla, ta ashi.

"Bommaier Yediyurappa nunger tenüng-a khen mesüra anabenbo teshiangma, yamaji süra parnokki pelatsü," ta paisa ashi.

Iba election ya Karnataka nungertem, lanurtem, tetsütem aser aianutem atema lir, ta shia Rahul Gandhi-i, "Iba election ya nisung ka atema masü, Narendra Modi atema masü. Ato kilonseri ibaji angatetsüla," ta ashi.

"Na (Modi) yagi Karnataka elections atema nüboyimtsü asoshi aru, saka nai Karnataka atema mejembir. Nai nü indang ang jembir. Tesüiba küm asem tsüngda nai Karnataka nung kechi inyakar iba indangji jembitsüla. Nai jembiba mapang nung nai taruba küm pongu nung kechi inyaktsü, nai lanurtem, shisaliok, health aser ochimashi anema kechi inyaktsüar iba atemaji jembitsüla," ta Rahul Gandhi-i ashi.

Rahul Gandhi-isa Congress manifesto indang metetdakja, party-i takok ngura kibong shia electric light unit 200 angati agütsütsü, kibong shia tetsütem nem ita shia sen 2,000 teyari agütsütsü, BPL kibong shia nem jang seret 10 agütsütsü, graduate lanur shia nem ita shia sen 3,000 aser diploma holders shia nem ita shia sen 1,500 agütsütsü aser public transport bus nung tetsürtem angati senzüdaksütsü, ta metetdaksü.

Gandhi-i, "Iba election ya na atema masü saka Karnataka nungertem aser parnok tarutsü atema lir. Congress-i na 91 ben aitsü ta nai jembir saka nai Karnataka atema kechi inyakar mejembir. Nai kechi inyak aser taruba küm pongu nung kechi inyaktsüar iba atemaji jembitsüla," ta ashi.

Paisa nüburtem dang, sübokrem shilem 40 agiba BJP nem menden 40 dang ngudakjang aser Congress nem tajemba agia menden 150 nung takok ngudakjang; ibaji ajanga dang parnokki MLA tem sen agi malizüktetsü aser parnokki democratic ajanga shimba sorkar matsüngdaktetsü, ta metetdaksü.

# Karnataka assembly election atema BJP-i manifesto sayaogo



May 01, 2023 nü Bengaluru nung BJP National President JP Nadda, Karnataka Chief Minister Basavaraj Bommai, taoba mapang Karnataka chief minister BS Yediyurappa aser party lenirtemi Karnataka Assembly elections atema party manifesto sayadang tangokba noksa nung angur.

**Bengaluru, Monupii/May 01 (Agencies):** Karnataka Assembly elections atema Hombarnü Bharatiya Janata Party (BJP)-i party manifesto sayaogo; BJP-i takok ngua maneni sorkar kümra Uniform Civil Code (UCC) benoktsü, ta nangzük.

scheme kübok BPL kibong shia nem anogo shia Nandini mamatzü litre tesadang agütsütsü aser ita shia ration kits ajanga Shri Anna - Siri dhanya seret pongungu agütsütsü, ta nangzük.

ka tentetsü," ta pai ashi.

Hombarnü Bengaluru nung BJP national Tir, JP Nadda-i party manifesto sayatsüogo aser iba sentong nungji Chief Minister, Basavaraj Bommai aser taoba mapang chief minister aser Lingayat lenir, BS Yediyurappa-a liasü.

Karnataka atema BJP manifesto ya nisung aika den shisa lemsatepba sülen ang renema liasü, ta BJP Tir, JP Nadda-i metetdaksü.

"Manifesto renemtsü atema party nung inyakertemi state tesem ajakleni semdanga liasü aser kibong lakh aika den shisa lemsatepba sülen manifesto renem," ta pai ashi.

BJP-i manifesto nung küm shia Below Poverty Line (BPL) kibongtem nem gas cylinder asemsem angati agütsütsü nangzükka lir.

Paisa, manifesto ya onük trok nung ajemdaker yanglu aser itemji- chiyungtsü security, shisaliok tajung, jenjang dalang agi healthcare, income support, ajak atema temeden, ajak atema terenlok aser azükaru lir, ta metetdaksü.

Taoba mapang Siddaramaiah-i aniba Congress sorkar aija pai, 'taoba sorkar tu tesüleni atsüngzükka odaktsüba sorkar liasü', ta ashi.

BJP-isa parnokki 'Poshana' scheme tenzüktsü aser iba

"Loktiliba tsütsü temeden agütsütsü atema onoki Karnataka nung Uniform Civil Code (UCC) benoktsü aser iba atemaji High-Level Committee

Siddaramaiah-i aniba sorkari ali nungi adokba rongsen auya aser par sorkar kübok ozüng alema inyakba aika liasü, ta pai ashi.

Karnataka election nung BJP-i opposition Congress aser JD(S) den atongtepa tokteptsü. State nung assembly elections May 10 nü agitsü aser May 13 nü vote zünga election agiba osang sangdongtsü.

# IAF tongti, VR Chaudhari-i Sri Lanka semdang

**New Delhi, May 01 (Agencies):** Chief of Air Staff (CAS) Air Chief Marshal VR Chaudhari-i Sri Lanka semdangtsü Hombarnü apusoa ogo; pai anogo pezünü iba linük semdang.

State Minister of Defence, Chief of Defence Staff aser Sri Lanka Air Force, Army & Navy nungi commanders aser Defence Secretary ajurutsü, ta kasa sangdong nung shia lir.

Ano tanga osang ka nung, Chaudhari-i Air Force sepaitemi tang rara adoka aliba Sudan kübok Wadi Seidna area nungi tayimtsü ajanga nisung aika kümzükba atema tenüngsang agütsü.

Sri Lankan Air Force Commander, Air Marshal SK Pathirana-i jaokba nung ajemdaker IAF tongtii Sri Lanka semdang, ta Ministry of Defence-i sangdong ka ajanga metetdaksü.

Chaudhari-isa National Defence College, Sri Lanka nung student officers den jembitsü aser Sri Lankan Air Force Academy semdangtsü. Pai Sri Lanka semdangba ajanga linük ana tsüngda tesendaktep aser amalitep jenjang tajungba akümtsü, ta sangdong nung shia lir.

Paisa linük nüburtem dang, Air Force-i tensa mapang tamajung nung ajangshiba mission balala inyaktsü, ta nangzük.

Sri Lanka nung Chaudhari-i Sri Lankan Tir, Ato kilonser,

April 27-28 anogotem nung IAF C-130J tayimtsü ajanga Wadi Seidna nung aliba airstrip nungi sepa 121 kümzükka liasü.



May 01, 2023 nü India nungertem Sudan linük nungi Kochi (Kerala) tonga aruba sülen tangokba noksa nung angur.



## TIR YIMYIM YIMOBILEM (EDITORIAL)

DIMAPUR SANGTENNÜ, MONUPII (MAY) 02, 2023

### Tanü asüng Moatsü

**A** ortem asoshi tang ya alu mapa ajak toktsür anisüngzüka pelatepa amongba moatsü mapang lir. Atangji, tanü asüngbo asenok aikati tsük lu mayimer asünungji, asenok mapa den moatsü amongba ya mapet amai bilema alitsüa akok. Ajisüaka, kadang asenoki asen nüngdak asoshi inyakba mapatem ajakji alu ayimer amai bilemdir, atangji küm nung anogo kabo agiteta Tsüngrem tenüngsanga amongtsü aser kinünger, medemer aser yimtsür yimertem den pelateptsübaji kanga nüngdaka ta angatettsü. Tanü asenoki moatsü mongaka, aiben asenoki tanü asen mapa dak aketba temoatsütem züngdanga amonger masü saka akhi tetsü tebou mapang amongba benjong ka parnok bilemtettsü asoshi amonger amai amonger, iba jagi tarutsü atema bilema renloka aotsü asoshi asenok kolok dangi tarua marur aser temulung nung tebilema mebilemer. Ajisüaka, tanübo asenoki moatsümung ya koda monga aru ta asüba nung kija merangloki, tanüa asenoki kechiba moatsü amonger aser moatsü amongtsüsa asenoki kechi inyaktsüla ta asüba onüktem nung bilemdanga jembira, asenoki amongba moatsü ya tanüa asen lu aser asen mapa dak petpeter jangratema kibong nung aser lokti nung amongtsü. Moatsü ama benjong amongba mapa ya kenü ananüka pelatepa monger anentsüba mapa dangbo masü saka iba yagi asenok ajak dang taruba küma moatsü amongtsüsa meranga inyaktsü ajungshir. Tanübo asenok mapa indang moatsü benjong amonger masü saka akhidang asen tsüraburtem aluyimba mapa indang bilemteta moatsü amonger amai amonger. Iba kisüng atemabo kaket ka zülü nung teperi saka moatsü amongtsübo menüngdaker. Item ya bilemdanga tanü putu nung amongba moatsü yabo asenok mapa den putepa amongtsü asoshi mapa kar ajanga sendaktepdaktsütsü nüngdaker. Aji oda, akhi tsüraburtemi moatsü amongba ya alu nung metsü yokba maparen ajak temer anisüngzüka pelatepba amongba mong süra asenoka tanü pei pei mapa inyakdak ajak tipdema merükteta yur, ano mapa tasen ka tenzütsü renemer ama bilema pei akaba aser peii akokba rongsen, chiyongtsü aser temoatsütem agi temoatsür Tsüngrem aser teyariteper kinünger, medemer aser yimtsüryimertem nüng sanga külemi pelatepa moatsü benjong ya mongra, moatsü ya tesüiba anogotem bilemteta amongba benjong ka dang masü saka tarutsü indang bilema amongba benjong ka asütsü. Aji oda, Moatsü amongba ya Tsüngrem temoatsütem züngdanga, kinünger aser medemertem temeim bilemtetba aser moatsü monga pelateptettsüsa mapa meranga inyaktsü ajungshiba mapa aser mapang ka lir. Atangji, moatsü ya limapurtemi tenzük saka tanübo Khristantemi amonger, kechiyong moatsüji temenen masü saka asenoki moatsü nung Tsüngrem mepelatsüsa inyakra, ajiang temenen asütsü. Aji oda, moatsü ya anüdoklen nungi aru aser Yisu temeim yimsü tajung anülulen nungi aru, iba anaji tang tashi junga majuruteptetba agi ashiko asenoki Yisu daka junga mamangtetter aser moatsüa junga memongtetter asütsüa akok. Iba ana ya asenok alu mapa aser asenok tamang agi ajurutepdaktsütsüla. Aji oda, moatsü ya tamangba yimsü dak aketba mapa aser sentong lir, anungji yimteni aser loktii dang masü arogoia moatsü benjong ayongzüka sarasadem aser tenüngsang sentep tajung lia yimkong benjong chiyongba sentong ayongzüka lira, ajiang Aortemi Yisu moatsü benjongi jaoker asütsü. Asenoki moatsü nung yar tsüngsangtepba ya tai temenen mekümdaktsütsüla aser sobaliba kensü nung Tsüngrem tenüng sanga moatsü ken mejemer tsüngsanga atentsü bilema sentong yanglutsüla. Item ama tangatetba tajung, tasen aser tesadem jagi arogo aser yimten na longjemdaktsütsü aser yimten o arogo na prongla tashi taitba aakümtsü. Kasaji, kibong nung kinungertem den moatsü amongba ajanga tali teputepba akümtsü. Moatsü benjong ama kati asenok Tsüngrem anasai odaktsür aser kinünger medemertem longjemdaktsür. Moatsü ya tanüa kibong shia, lokti shia aser arogo shia nung amongtsü tim. Ajisüaka asür bilemteta amonger ka ama masü saka tang taküm alirtemi Tsüngrem aser nisung tenüng sanga amongba mung ka kümdakja longsulongsua amongtsü bilema mungdi.

## OLEMSABANG

### ASEN TSÜRABUR AMA ALU MERANGA AYIMTSÜ TENZÜKDI

~ L. Kika Pongener.

(Yashi adok nungi...)

Tanü asenoki asen Naga nungler tia reprangdangra alu ayimba kisung dak nendaker lia aruba chirtem aser semchirtem-to tanübo aluyimer aika mali küma-adok. Talisa, tangar kinji-bo khen oda toktsür asen Aor yimindak yimtsüng nung alirtem aika aluyimer mali kümadokogo. Yimtsüng aika nung alu puok aika arem min küma tawa yua lir. Surabangla, alu mayim ser iba melena tanga mapa tajungba ka tepok sunga chiyunga-jema litettsüsa makara kechi koda kibong taküm mesua alitsü...??? Hau, oda ita sen tila-ka asüyunga ngua alirtem sura ajia kecha masü...saka mapa kecha maka ser yimindak alirtem alu mayim koda kibong mesua alitsü...??? Manganutsü mali, tanü asen Aor yimindaklir-tem teimba ka pei adianu, pei chirnur jila nung alir aser takar-tulurtem dak nendaker alir teimba lir. Aji oda, jila nung alirtem teimba ka itasen tila ka agi jabaso-jala Private School & College nung zungdaktsür, ariana pei kibong khuret mekoksumongi alir teimba, saka ano yimindak alir tsürabur aser adianu dena arepba agi arok apangteper telungi aluba kibong aika lir. Hau, kati ka den yaritepa alibaji sobaliba tajung lir, saka ajak nungbo nendaker malitsüla, akokba tashi pei akokba mapabo meranga inyaktsüla. Tanü putu nung yimten, arogo aser loktiliba ajunga nung rongsen ketdangsuba mapa asadanga reprangdangra lokti teimba ka nung ochimashi agi sunger angutsü, aser aji kechiba ta bushidanga ora alima kanga sensakba agi, kechiaser koba lima kangasa sensaka lidir, iba lima nung nuburtem aikati ochishia melitettsü. Sen yong ochi ayoktsü aser supokrem tila ka nung metsüdaker alangtsü.

Tanü asenok tamangertem jenjang asadanga reprangdangra tamanger tajung aika tanü 'REVIVAL' sentep nungbo 'Kotak Tenyar' amai, saka ano asüngbo 'Mojing' yimya dangisa meyipa orr alir...Ya kechiba?...ta shisadangra maka-mait sensak tia agi teimba nangzukba ama meliteti atsüngzüka aotsüsa akümer, kechiyong kanga sensaka maka-maitra tiyazu jembia ochimashitsü aser auyatsüsa akümer. Anungji asenok rongsenkettsüng nung tang dang nungi jenjang tajungba kümnura, asenoki alu meranga ayimtsüla. Ajisuaka, aluyimba inyakyim nung ya akhi tejen putu yimya nung alu ayimba ya tera melenshitsüla lir amai ajiteter. Tekong-lu aser tsük-lu dang ayimba ya melenshir ali lenden telemok nungbo Tzu-lu ayimtsüla, aser asen lima tzu-mepong den apetba apir, sungjanglijang lu ayimtsüla, Alo aser Nu-lu ayimtsüla, Zungyi-Mendi-lu ayimtsüla, Bengana-Mersu-lu ayimtsüla, Azungken, Kolar-jang aser Maha-jang-lu ayimtsüla. Shiruru mesuba 'Farm' lapoka ayimtsüla aser sungdonglu ayimtsüla. Tangar India lima nungbo aluyima linuyongjia nisung ajakbo ali-arem peria makaba agi meyimteter, saka asenokbo ali-arem peria dang lir. Anungji tang nungi danga asenoki asen tsüraburtem ama meranga aluyimer, pei kibongbo küm nungi küm renteta tepok sunga chiyunga-jema alitsü merangdi, kechiaser mapa meranga inyakba nung kecha maaks? mali.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Pastor teimbakati counselling aser nütsüngsüba mejangrar: Barna

**Barna Group**  
Knowledge to navigate a changing world

**May 01, 2023:** Protestant pastor temi sabang nungi sayutsüngitsü janngar, ajisüaka kanga tongtibang teniyakstütem- nütsüngsüba, counseling, shirangertem aser tantsür-tamburtem semdangtsü mejangrar, ta Barna Group survey ajanga bushitet.

Yaküm September ita nung United States nung Barna group-i online ajanga Protestant pastor 585 interview agia liasü; parnok shilem 60-i parnok teinyaktsü mapatem rongnung parnoki tejangratibaji sabang nungi sayutsüngiba lir, ta langzü.

Pastor tem atema kanga tongtibang teinyaktsü rongnung nütsüngsüba aser Khrista osangtajung prokba lir, ajisüaka pastor shilem 10 den tajembai dang parnoki wadang nung tejangratibaji nütsüngsüba aser

Khrista osangtajung proktsü lir, ta ashi.

Barna Group ya Evangelical polling organization ka lir.

Pastor tem shilem 8-i dang pei wadang nung parnoki tejangratibaji nütsüngsüba lir ta ashi, aser shilem 7-i dang parnoki tejangratibaji kiboksema tantsür-tamburtem aser shirangertem semdangtsü lir, ta ashi.

Pastor tem shilem 6-i pei wadang nungi parnoki tejangratibaji counseling agütsütsü aser tanela tsütsü tamangertem anepalutsü lir, ta ashi. Pastor tem shilem 4-ibo parnok atema tejangratibaji senden aser sentong balala ayongzüka agitsü lir, ta ashi.

Pastor tem shilem 3-i dang pei wadang nung parnoki tejangratibaji Khrista osangtajung prokba lir, ta ashi.

Taoba mapang lawyer aser Ontario nung aliba Connexus Arogo nung pastor, Carey Nieuwhof-i, tanü putu nung nütsüngsüba tsütsü Arogo tangatetbaji tai lir; chichiba nütsüngsüba tangatetba nungi Arogotem pilaogo, ta ashi.

Pastor Nieuwhof-i, "Nütsüngsüba inyakyim ka lir, kong Khristan ka anogo aben Khrista mesüka akümba lir. Asenoki Laishiba nung aliba ama Khristai sayuba sülen anidaktsü atema tangertem ajungshiba ajanga nütsüngsüba mapa inyaker. Iba ya formula ka mesüra mera ka nungi ka, ta inyakba sentong ka masü. Eugene Peterson-i ashiba agi, nütsüngsüba 'kasa lenmang nung mapang talangka tashi angaba lir," ta metetdaksü.

Nieuwhof-i chichiba nütsüngsüba nungji Khrista osangtajung prokba aser nütsüngsüba na sendaktepa lir, ta ashi.

"Na Khrista osangtajung proker ka mesüra na nütsüng ka mesütetsü," ta pai ashi.

## India nung yimsü lenirtemi Supreme Court tetuyuba pelaa agizüker



**May 01, 2023:** Taoba hopta Supreme Court-i state tem aser Union territories ajak dang tesempa o jembirtem anema tekaraba nung ken o benoktsü tetuyuba agütsüba sülen Khristan lenirtem densema tamangba yimsü balala nungi lenirtemi SC tetuyuba pelaa agizükogo.

April 28 nü Supreme Court-i state aser UTs ajak dang tesempa o jembirtem anema compliant magütsüyonga tekaraba nung parnok anema ken o benoktsüla, mesüra ibaji court mezüngmeshiba ama züngshitsü, ta metetdakja liasü.

Justices- KM Joseph aser BV Nagarathna nati akümba bench-i, tesempa o jembibaji ozüng alema aibelen tuluka lir, aser ibaji ajanga India nunger secular jenjang raksatsütsü, ta ashi.

Osangbener den jembidang Delhi nung Federation of Catholic Associations Tir, A.C. Michael-i, "Onoki SC tetuyubaji pelaa agizüker. Taoba mapang nunga Supreme Court-i item ama tetuyuba agüja liasü saka ketdangsertemi mapa küma meinyak," ta ashi.

Taoba mapang Delhi Minorities Commission nung züngsem Michael-i, tesempa o jembir yimtenren lenirtem nem temerenshi agütsütsü mapang tongogo, ta ashi.

Michael-isa, "Tawa Union home minister-i south tsütsülen aliba state ka nung par party-i takok mengura rara adoktsü ta jembio. Supreme Court-i minister anema inyakra ibaji ajanga tangartema tansütsü," ta ashi.

Hindu nunger lenir, Goswami Sushil Maharaj-i,

party lenirtem aser yimsü lenirtemi tesempa o jembiba ya secularism atema lendong, ta ashi.

Indian Parliament of Religions nung Tir Maharaj-isa, "Yimsü kecha tuluba mesüra tilaba ta mali, anungji yimsü kar anema jembitsü asenok dak temeden mali, kechiyong yimsü ajaki tangar akhümtsübuttsü atema tesayuba agütsür," ta ashi.

Muslim nunger lenir aser Centre for Harmony & Peace chairman, Muhammad Arif-i, "State ajaki iba tetuyuba benschitsü ta ni amanger," ta ashi.

"Tesempa otem ya talisa Muslim nungertem anema jembir. Anungji iba tetuyuba (SC tetuyuba) ajanga linük nung tesünep bener arutsütsü ta onoki amanger," ta paisa ashi.

## ANOGO ABEN TSÜNGREM DEN

### Mapa Tulu Meinyak (T.Ken 103:6-12)

Kibubai asen asoshi langka inyak nung asenoki Pa tenüng asanger. Tanü, Pai asenok asoshi langka inyakba asoshi Pa tenüng sangdi. "Asen temenen yari Pai asen dang mebenshir, mesüra asen tai yari asen nem majangzüksür" (t.10).

Ajaki pei mulung nung wara aliba metet-mapang mapang nung temenen menaba dang masü saka shirnoki asenok talenba nung ayutsü meranger itemji. Tsüngremi item ajakji indang metetta lir. Shidakba nung aseni asen menen metetba dang nungi tejangjaba Pai asen menen tajungba metetta lir. Tsüngremi temenen adokdak aser asen menen nungi adokba metetta lir. Pai temenen kanga sempaba kuli kaji, Pa temeshi lir, aser temeneni koloni anir Pai metetta lir. Yakobi ashir, kodang azüapungba mashisa kümdir, iba yagi temenen asor. Aser kodang temenen tain kümdar, tasüba adokdaksür (Yakob 1:15). Tamajungba mashisa akümbaji temenen noksa lir.

Saka Ken züluri ashir, "Tsüngremi asen menen yari mebenshir." Kechi nung ajemdaker Pai asenok dang benshira? Kangki, taochi nung ajemdaker Pai asenok dang benshir. Yisu Khrista asen menentem asoshi asü, aser Par chir zü ajanga itemji tatok agütsür. Asenoki Pa dangi arutsü akok aser Pa dang temenen tatok meshitsü akok.

Saka Tsüngremi ne menentem yari ne dang mebenshir ta metetba jagi nai Tsüngrem matitangtsü kümdangang. Temenen den tesama. Temenen sempang, Yisu Khrista kangki ajanga na Tebu den tanü jajar ta pelaa liang.

Tsüngremi ne menentem yari mebenshir saka kangki yari ne dang benshir ta metetta tanü pelaa liang. Ne tatok jenjang tulu lir. Kodang na temeneni atitangdir, temenen taaji shisadangang. Na Khrista dak sentsü tulu lir, anungji Pa peladakja liang.

## China nung Covid mask nung Lai otem atema sayutsüngir ka apu

**May 01, 2023:** China kübok Yunnan province nung aliba Protestant house church ka nung Lai otem keta aliba Covid-19 masks alemba agi sayutsüngir ka puogo.

Zhaotong yimti kübok Zhenxiong county nung aliba Arogo ka nung sayutsüngir, Chang Hao April ita tanabuba hopta nung puogo.

Hao-i house church ka lapoka lir, aser iba Arogoji sorkar ketdangsertemi melaba Three-Self Church nung register süa maliba agi police-i mita ao.

Osangbener den jembidang Chang Hao kinüngtsü Enlin-i, April 14 nü police-i Laishiba, Khristan kakettertem aser Lai otem zülua aliba maks aika apu, ta metetdaksü.

Chang Hao-i Lai otem zülua aliba mask aika lemetsüogo, ibayongji Chinese Communist Party ketdangsertem jashia liasü, ta lai ashi.

Chang Hao apuba sülen pa ajurutsü atema kinüngertem aser lawyer nem temelaba magütsür, ta laisa metetdaksü.

Police-i pa apuba sülen tasemnübuba nung police-i parnok aja, aser maneni anogo

asemnü puoka ayuba sülen pa anema bushisüngdangtsü ta metetdaksü.

"April 20 nü lawyer den onok Zhenxiong Detention Center-i oa kinüngbu ajurutsü sentong liasü, saka onok pa den majurutepdaksü. Anungji onok Zhenxiong Public Security Bureau dangi oa temepishiba shidi ka agütsü. Parnoki onok dang, pa anogo 8 nü pua ayutsü ta ashi," ta laisa metetdaksü.

Enlin-i, "Tang kü kinüngbu kong aliar ni memetet. Onoki kechi inyaktsüar memetet, anungji nenok dang sarasadem ajanga yariang ta mepishir," ta ashi.

China nung sorkari melaba Three-Self Church nung register masüba Arogotem nungi pastor tem, sayutsüngirtem aser Khristan aika puogo.

2013 küm Xi Jinping Tir akümba sülen nungi tenzüka Khristantem anema inyakba kanga bulua kümogo; talisa China-i 2018 küm Regulations on Religious Affairs agizükba sülen nungi iba linük nung Khristantem kanga timtemer.

AO OSHI ANGAZÜKDAK: TANÜ ANGAZÜKTSÜBA OJANG



Puje

(n) kidong asem ( three clans)

\* Puje asem tetsü-teboutem anüdoklen nungi aru.

Pukhüm

(v) yariba, nungitba, aseмба (favour)

\* Nisung aikati tiyazü nunga pei nisung pukhüma nokdaker.

OLONG PAITEP # 6502

Grid for OLONG PAITEP # 6502 with numbers 1-16 in various positions.

TIPIEN

- 1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T \_\_\_ lu - (3)
10. Takdang temalen - (9)
11. Tesa \_\_\_ a - (3)
13. Ajungbena temulungjang tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

- 1. Reprangdaksü - (4)
2. \_\_\_ ur - (3)
4. Kiojen yangludak - (6)
6. \_\_\_ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemetdak - (6)
12. \_\_\_ adenshi - (4)
14. Tsünusenbongtsü adokdak - (3)

OLONG PAITEP # 6501 TELANGZÜBA

TIPIEN :

- 1. Kasa, 6. Rangben, 7. Mait, 9. Poktet, 11. Ati, 13. Atasa, 16. Rür, 17. Rajang, 20. Lanu, 24. Nüngjem, 25. Süra.

LANGTSÜNGLEN :

- 1. Khu, 2. Süjak, 3. Onük, 4. Oba, 5. Anü, 6. Ratet, 7. Mozü, 8. Ita, 10. Tar, 12. Tinu, 14. Salem, 15. Aja, 18. Anünü, 19. Taju, 21. Ano, 22. Onü, 23. Kua.



ALOKBA O TEBU NA ZOO SEMDANGER :

Alokba : Oba, nai ashiba ama, küyi ya kanga tesashi süra tatishitsü agi jenteta adoker na ya nguseta achi nungbo.....

Tebu : Kwa jabaso nai kechi shinerba?

Alokba : Yamaji ka atalok nunga ni kidangi shilangdang koba bus nung aotsüar na, oba?

Tebu : Oh Alokba!

Lilir : WhatsApp

Advertisement for 'Tepela Tasoba Anogo' featuring a birthday cake and contact information.

Dr. Guruaribam Sunil Kumar Sharma-i RIMS, Imphal Director inyaktsü



Imphal, May 1, 2023 (Agencies): Regional Institute of Medical Sciences (RIMS), Imphal nung Director inyaktsü atema Government of India, Ministry of Health and Family Welfare (NE Section)-i Dr. Guruaribam Sunil Kumar Sharma shimogo. Iba ya Appointment Committee of Cabinet ajanga mulunga agizükogo ta 01.05.2023 nü DoPT order ajanga ashi. Dr. Guruaribam Sunil Kumar Sharma ya tang Vardhman

Mahavir Medical College and Safdarjung Hospital, New Delhi nung Professor of Forensic Medicine & Toxicology Director inyaker.

Pa ya küm pungu atema foreign service (including short-term contract) basis nung Director, RIMS, Imphal inyaktsü shimer.

Dr. Guruaribam dang iba sangdong agütsüba sülen ita ka tsünga Director, RIMS, Imphal mapa tenzüktsü atema mepishia metetdaksüogo. Pa indang appointment ya mapang shia Government of India ajanga reprangshimtsü.

RIMS, Imphal nung Director indang interview ya December 22, 2022 nung agia liasü.

Manipur sorkari Zo nunger dak tashiyim inyakba aitsür: MZP

Aizawl, May 1, 2023 (Agencies): Manipur nung tensa nung tenük yokdar aser Chief Minister N Biren Singh-i aniba BJP sorkari Zo nunger meindoktsü merangba aitsür ta Mizoram nung kaketshir tentet Mizo Zirlai Pawl (MZP)-i metetdaksüogo.

Kuki nunger teimba ser aliba Churachandpur nung Brihostibar nungi tensa mejungi aküm. CM Biren Singh-i shilem agitsüba tesem rongdoktsüba ajanga tensa raksa aser April 30 tashi nung tensa süngjemogo.

"Item khuret ya Manipur sorkari Zo nunger meindokba parnok ali atsünga agitsü merangba ajanga adokba liasü. Manipur sorkari lisopur alitem reserved forest, protected forest, wildlife sanctuaries aser

wetlands ta sangdongnür" ta MZP-i ashi.

"Manipur Chief Minister N Biren Singh'er sorkari lisopur Zo nunger anema inyakba aitsür. Manipur Chief Minister-i inyakba mapa ya Northeast longjemtsüba anema lir" ta MZP-isa metetdaksü.

"Mizoram nung non-Mizoram nunger asoshi Inner Line Permit (ILP) nüngdaker saka onoki Manipuri (Meitei) nunger asoshi khuret kecha magütsür, onoki parnok mezüngdoker" ta MZP-isa ashi.

"Manipur sorkari Northeast nunger ozü adianutem parnok yimtsüngtem nungi meindoktsü merangba ya onoki magizüker. Manipur sorkari tangsa Zo nunger anema inyakba mapa anentsü akhanger" ta MZP-isa

metetdaksü.

"Manipur sorkari ozü nisungtem dang ILP meshiba anentsüla. Manipur sorkari Zo nunger kümzüka melitetsüsa mapa inyakra Mizoram nung Manipuri (Meitei) nunger asoshi onoki tebilemstü khuret kecha mabentsü" ta parnokisa ashi.

ILP ya India sensotem protected region kati mapang telatet ka atema aitsü asoshi official document ka lir. ILP ya Nagaland, Mizoram, Arunachal Pradesh aser Manipur nung benshir.

Manipur sorkari eviction drive ka agi aser "reserve forests, protected forests, wetlands, and wildlife" indang survey ka agiba sülen Kuki nunger asoshi khuret aika bentsür arua lir.

Myanmar anasa telungpur 2 apu; KCP (PWG) züngsem 2 temai adok



Imphal, May 1, 2023 (Agencies): Manipur nung security personnel-i telungpur ana apu. Tena ya PREPAK-PRO aser KIA nung züngsem kaka lir.

Moreh nung Myanmar arrtsü anasa Haolenphai junction nung Assam Rifles-i tena apu.

Assam Rifles sepaitemi Indo-Myanmar arrtsülen nungi Haolenphai junction-i nisung ka aruba nung temulung melemi bilem ta AR sangdong ka nung ashi.

Parnoki pa dang asüngdangya asüadang pa PREPAK-PRO züngsem ka ta nangzük.

Ano, May 1 nü Churachandpur district kübok Mata Lambulane nung sepaitemi Kuki Independent Army (KIA) züngsem ka apu. Külen, Kangleipak Communist Party - People's War Group KCP (PWG) züngsem anati Assam Rifles aser police tsüngdang temai adokogo.

Tenati .22 pistol ka, .22 pistol magazine ka, live .22 rounds aser Chinese hand grenades 2 bener arua agütsü, ta Hombarnü ketdangsür kati ashi.

Somsai Battalion-i kanga dang meranga inyakba ajanga KCP (PWG) züngsem ana

temai adok defense wing-i metetdaksü.

KCP (PWG) ya Manipur lendenlen telungpur telok ka lir aser parnokki 1948 nung aliba ama Manipur akümstü akhanger.

April 21, 2023 nü Chin-Kuki Liberation Army (CKLA) züngsem 36 aser People's Revolutionary Party of Kangleipak (PREPAK-Pro) züngsem ka temai adoka liasü.

Iba sentong ya Ist Manipur Rifles Banquet Hall, Imphal nung agi aser Manipur Chief Minister N Biren Singh-i tongti tesemdang ama aden.

# Paraguay election nung Santiago Pena-i takok angu



**Asuncion, Monupii/May 01 (Agencies):** Santiago Pena-i Paraguay election nung takok nguogo, anungji kanga sashia toktepa sülen conservative Colorado Party-i sorkar tentetsü.

Arishi küm 44 tain economist aser taoba mapang finance minister inyaka alisangi ballot shilem 99 dak tali azünga nungi shilem 42.7 ngutet, koba Concertacion coalition nungi arishi küm 60 tain lawyer Efrain Alegrem madak points 15 dak tema agi timba lir, ta electoral body ajanga ashi.

Iba South America linük nung nütsüng yongsük million 7.5 aliba nungi tir aser legislature election nung vote agütsütsü nisung million 4.8 temsüa liasü. "Iba Colorado takok atema pelar, iba Paraguayan takok asoshi pelar," ta Pena-i ashi.

Tanü asenok kisüngi takok anguba benjonger masü, asenok nüburtemi takok anguba benjonger, kechiaser parnok vote ajanga loktiliba nung yimjung, jembishinü, nübur aser

linük jungshiteptsü asoshi lenmang shimtet.

Tamakok anguba agizüka Alegre-i tongmelang agi, "Asenoki inyakba teperi masü," ta ashi.

Vote agitsü lia opinion polls nung okatsür Alegre ya jenjang tera tajungba liasü, anungji pai 1947 sülen nungi tanen makai yimsü süa aruba Colorado Party melentsü akok ta imlaa liasü. Iba mapang nisung ka kijai yimsü asüba aser 1989 küm democracy dangi meyipba ajangshia lir.

"Tesüiba küm rongsenketzüng tsütsü terenlok maliba, fiscal deficit sülen asenoki inyaksü jenti lir, asenoki inyaksü aliba mapa ya nisung ka mesüra party ka kisüng atema masü," ta Pena-i takok ngur ashi aser telungjem aser ajaki molungteptsü ayongzük.

Economic aser international policy nung parnok balala süaka tenaprong loktiliba tsütsü conservative liasü, anti-abortion rights aser anti-gay

marriage asoshi tasü ita nokdaka liasü.

Paraguay ya Catholic nunger timba aliba linük ka lir.

Taiwan ya temeja linük ka ta agizükba linük 13 rongnung Paraguay ya ka lir, aser Alegre-i takok ngura tesendaktep khen bilemdangshitsü ta shia liasü aser Pena-ibo tesendaktep ayutsü shia liasü.

China-i pei sasa yimsü asüba democratic Taiwan ya par litsü ama züngshir aser iba asetkong amokbangtsü atema tashiyim mamshitsü ta shia mali aser international sapang nung Taiwan ya azüngmeyaka yutsütsü meranger.

Costa Rica-i 2007 nungi Beijing busemer, Panama-i 2017, El Salvador-i 2018, Nicaragua-i 2021 aser Honduras-i March ita nungi Beijing busemer.

Paraguay nung aliba Taiwanese embassy ajanga Pena nem takok tenüngsang agütsü aser Taipei-i maneni Paraguay den tesendaktep tajung asoshi inyaksü, ta ashi.

Alegre-i Colorado Party nung ochimashiba indang jembia liasü, kechiaser iba party nung tanishir ana nem tawa United States-i ochimashi maparen mechi tenokdangba agüja lir.

Nisung ana nungji Pena indang political mentor aser Colorado Party tir aser taoba tir Horacio Cartes densema lir.

Transparency International's Corruption Perceptions Index indang linük 180 nungi Paraguay ya jenjang 137 buba nung lir.

# MULUNGNEN O



Onoki teti dang meima aliba Ojala **Asür O. S. Akala**, 26 April 2023 anogo nü ajungbena iba alima nungi pila aoba mapang, shirnokisa ozü kibong meima yaritepogo, nenok ajak dang temulung neta pelar. Talisa Dr. Rachel, Lenjem hospital staff aser nurse aser Wb. Tongpang Ozukum, Hon'ble Advisor, Water Resources, Govt. Of Nagaland dang balaka pelaba lemsar. Maneni lokti tentet balala, kiyong kidanger aser kija kibong kwikati rongsen aser nübu endok mesasai ozü kibong yariogo, onoki nenok nem meyipba agütsütsü kecha maka, saka asen takar Tsüngremi nenok moatsütsü ta ozü kibong sarasadem.

Nenok teyari, amalitep aser sarasadem onoki kodanga mamatsü.

*Temeim Kinungbo, Chirnur, Semchirtem aser Kinungertem*

# Ukraine indang air defence system-i missile 15 khadangogo

**Kyiv, Monupii/May 01 (Agencies):** Ukraine-i ashiba agi, parnok indang air defences-i Russia nungeri missile 18 khaloktsüba nungi 18 shi khadangogo. Moscow-i tawa asendenshir Ukraine nung tesem balala maka arudar.

"Homban anepdang 2:30 ako shi nung Russia nungeri strategic aviation planes tem amshia Ukraine maka liasü," ta ommander-in-Chief of the Armed Forces Valeriy Zaluzhnyi-i Telegram channel ajanga ashi.

Civilian asüba mesüra nisung aliba ki raksaba mesüra infrastructure tem raksaba indang osang kecha mali, ta Kyiv nungi ketdangsürtemi metetdaksü.

Ukraine yimtiba dak khaloktsüba missile ajak khadangogo. Anogo asem tsünga Russia-i Kyiv anabenbuba makogo.

Kasa mapang nung Kyiv region, koba linük yimtiba kübok mali, iba tesem nunga air defence systems tem amshitsüsa aküm, ta ketdangsürtemi ashi.

"Taoba anogo ishika tsünga tsükshirtemi Ukraine nung tesem balala 39 ben makogo aser iba mapang artillery, Grads [multiple-rocket launchers], UAVs [unmanned aerial vehicles, mesüra drones] aser aviation nungi injang 163 tashi khaloktsüogo," ta Kherson

military administration nungi Oleksandr Prokudin-i ashi. "Tsükchirtemi Kherson tiben tashi makogo. Russia-i iba tesem amakba sülen nisung ka süogo aser tanur ka densema nisung asem tashi yiruogo."

Russia-i tang tashi Kherson nung tesem kar amokbanger lir, saka iba tesem yimtiba nungibo taoba küm November ita atsünginogo.

Russia nunger missile tem ya Dnipro yimti nunga khaloktsüogo. Air defence crew temi missile tenet khadang ajisüaja nisung 25 tashi yirua temang anepalutsüsa aküm, ta regional council ketdangsür kati ashi.

Anütoklen aliba Pavlohrad yimti manger mesangwa tsünga anaben tashi makogo aser industrial enterprise ka apartment building 19 aser nija ki 25 raksatsüogo, ta paisa ashi.

Anüolen aliba linüktemi hadir balala agütsüba sülen ita ishika tsünga Ukraine indang air defence systems tashi ita kümogo. Hadir balala agütsübatem rongnung America-i April ita Patriot missile systems agütsüba densema lir.

Ukraine kübok anütok aser anolentiplen Russia nungeri tesem balala atsünger aliba nungi mintoktsü atema Kyiv renema aliba mapang Moscow-i tang asendenshir Ukraine maka arudar.

# Turkey-i Syria nung ISIL lenir ka tepset: Erdogan

**Ankara, Monupii/May 01 (Agencies):** Turkey indang itdangiter temi ISIL (ISIS) telok indang lenir südi ta temoung melemi alisang Abu al-Hussein al-Hussein al-Qurashi tepsetogo, ta Turkey Tir Recep Tayyip Erdogan-i ashi.

Erdogan-i ashiba agi, Turkey itdangiter temi mapang talangka nungi iba nisungba mita arur operation ya tenzük.

"Syria nung yashi Turkish national intelligence organisation ajanga operation agiba nung iba nisungba ya tepset," ta Erdogan-i TRT Turk broadcaster den Deobarnü jembidang ashi.

"Asenoki tebensa makai kiralongrar teloktem den maneni raratsü," ta tiri ashi.

Syria nunger aser security osang ajanga ashiba agi iba operation ya Syria north tsütsü Jinderes jila nung agia liasü, koba Turkey-i busemba telok kübok lir aser February 6 nü Turkey aser Syria nung menoknok anokdang tesashitiba kongshiba tesemtem rongnung ka lir.

ISIL (ISIS) nungi kecha sangdonga mali. Iba operation agiba tesem nung aliba Syrian National Army nungia sangdong kecha agüja mali.

Northern Syria nung osangbener kati ashiba agi, Turkish intelligence agentsü aser yangji Turkey-i yariba military police temi Honibarnü

Jindires nung tesem ka ajaklen nungi shibanga liasü.

Islamic school ama amshiba farm tejen ka nung tenük yoker operation ya agi, ta yangji alirtemi ashi.

Jila tezülen Honibar aonung nungi Deobarnü tashi khatapa liasü aser yangji alirtemi ola tulu adoka apokba angashi, ta yangji alir kati ashi.

Mapang tatsüka lir security forces temi iba tesem ya lungbanga shinga marudaktsü.

Al-Qurashi jakdang inyaka alisang November 2022 nung tepsetba sülen pa ISIL (ISIS) lenir akum.

2014 küm ISIL (ISIS) teloki Iraq aser Syria nung tesem tuluka agia liasü aser iba mapang par telok nung tekolakba Abu Bakr al-Baghdadi-i nisung million aika aliba tesem nung Islamic caliphate sangdonga liasü.

Ajisüaka Syria aser Iraq nung US-i bukumba sepaitem aser ano Iran, Russia aser danga paramilitary temi yariba Syrian sepaitemi rara tenzükba sülen iba telok tashi meiti akum.

Tanünga züngsemtem ya timba Syria aser Iraq tesem tezülen atsükoka lir aser mapang shia lendong agütsür.

Taoba küm November ita jihadist telok yagi par lenir Abu al-Hassan al-Hashemi al-Qurayshi asüba sangdonga

liasü. Pa ya south-west Syria nung 2022 küm October ita tiyonglen Free Syrian Army ajanga operation agidang tepset, ta US-i shia liasü.

Taoba lenir Abu Ibrahim al-Hashimi al-Qurayshi ya February 2022 nung khatapba sülen US special forces temi pa atsüka aliba tesem lungbanga pa-sasa poksetba sülen Abu al-Hussein al-Hussein al-Qurashi ya iba telok lenir akum.

Iba operation nung alima asoshi kiralongrar tongti ka samatsüogo, ta US Tir Joe Biden-i shia liasü.



Siهانoukville, Cambodia, May 01: Cambodia Ato Kilonser Samdech Techo Hun Sen-i Siهانoukville, Cambodia nung aliba Siهانoukville Autonomous Port nung May 1, 2023 nü container terminal tasen ka yanglu tenzüksüadang tangokba noksa nung angur. 2029 tashinung iba rongnendak tesem ya tongtipang tesem ka kumdaktsütsü nükjidong nung Hombarnü nungi tenzük container terminal tasen ka yanglur.

### Ukraine nunger Judo asayartem World Championships nung masayatsü

**Monupii/May 1, 2023 (Agencies):** International Judo Federation's (IJF)-i Russia aser Belarus nunger asayartem neutrals ama asayadaksütsü asoshi teletmetba agiba sülen Ukraine nunger judo asayartem iba ita Qatar nung asayatsü aliba world championships nung masayatsü, ta Ukrainian Judo Federation (UJF)-i Hombarnü metetdaksü.

International Olympic Committee (IOC)-i taoba ita iba linük ana nungi asayartem international tetoktepbala nung neutrals ama toktepdaksütsü asoshi benoka liasü.

IJF-i taoba ita sangdong ka ajanga, May 7 nungi 14 tashi asayatsü aliba asayamung nung Russia aser Ukraine nunger

judo asayartem shilem agidaksütsü ta ashiba den iba ajanga Russia aser Belarus nunger asayartem 2024 Paris Olympics atema qualifying nung shilem agitsü atema maongka agütsütsü ta ashi.

IOC-i tetuyuba agütsüba nung rara pusemertem aser military mesüra national security agencies tem kübok contract nung asayartem densema mali. IJF-i ashiba agi, asayartem jenjang jangjatsü atema parnoki independent company ka anisemogo.

Ajisüaka Ukrainian Federation-i ashiba agi, asayamung nung shilem agitsü atema züngoksemer aliba Russia nunger judo asayartem ya "active servicemen" tem lir. "Doha nung World

Championships nung Russia aser Belarus nunger asayartem shilem agidaksütsü atema IJF bangzüng nung shia aliba ama onoki neutrality mesüra yimjung atema apu latsüba mangur."

"International Olympic Committee-i tawa tetuyuba agütsüba den meputepba teletmetba ka agiba onoki angur.. International Judo Federation-i iba teletmetba agiba atema onok kanga tezü atanger. Anungji onoki Doha nung World Championships nung shilem magitsü atema teletmetba agiogo," ta UJF-i ashi.

Russia aser Belarus nunger asayartem shilem agiba asayamungtem nung Ukraine-i national sports team tem shilem magidaksüti arudar.

### Chandmari HSS-i ayongzüka half-marathon asemtepogo



**Kohima, Monupii/May 1 (TYO):** Chandmari Higher Secondary School (CHSS), Kohima-i ayongzüka tanü Half Marathon asemtepogo.

School 2024 küm Hon jubilee amungtsü aliba nungtem nung sportsmanship tanüla adokdaksütsü nükjidong nung iba asemtepba ya ayongzüka agia liasü.

Kohima kübok school balala 11 nungi kaketshir 54 densema iba asemtepba nung kaketshir 301-i shilem agia liasü.

Kohima kübok tanga school tem nungi asemtepertem senior tetsür aser tebur category nung dang shilem agi aser junior tetsür aser tebur category ya Chandmari Higher Secondary School kaketshirtem atema dang liasü.

Iba sentong ya CHSS Principal Asenla Temsu-i sarasademer tenzüka liasü.

**Category balala nung takok angurtem:**  
**Senior Boys (From Classes 8-12) (Kohima nung aliba school ajak atema):**

**Winner:** Tseibou Rupreu (Class 10 Vinyüzo HSS, Bayavü)

**Runners-up:** Theruovilie Chadi (Class 10 Chandmari HSS)

**Senior Girls (Classes 8-12) (Kohima nung aliba school ajak atema):**

**Winner:** Medovino Nagi (Class 8, Baptist Mission School, Jotsoma)

**Runners-up:** Susmita Shrestha (Class 8, Baptist Mission School, Jotsoma)

**Junior Boys (Host School nung Class 7 tashi):**

**Winner:** Yaolai (Class-7)

**Runners-up:** Moalong (Class 7) Junior Girls (Host School nung Class 7 tashi):

**Winner:** Mercy Phainyu (Class-7)

**Runners-Up:** Chongti S (Class-6).

Asemtepba nung takok angurtem nem Crescent International Hotel, Kohima, Imprint, Kohima aser AB's CHSS, Kohima-i sponsor süa senpet aser kuli kaket agüja liasü.

### Asian Medal dang nungi ochi obendang tongtibangba: Bajrang Punia



**Monupii/May 1, 2023 (Agencies):** Linük nung nungtuwu wrestler temi anir Jantar Mantar nung wrestler temi maneni longkak aitba mapang Olympic medallist Bajrang Punia-i ashiba agi, Asian Games dang nungi tetsür wrestler tem nem ochi obendang agütsütsüji tongtibangba.

"Onoka asayaner aser Asian Games nung oa masayaner ta masü. Ajisüaka Asian medal dang nungi linük jalatem nem ochi obendang agütsütsüji ajak dang tongtibangtiba ta ni amanger," ta Bajrang-i ashi.

Asian Games ya taküm September ita asayatsü lir aser tanga mapang ama asünungbo tang tashi nungbo asayartem training nung temulung agüja inyaka aliba mapang ka lir.

Asian Games masaya tsüngda training camp achaayangtsü atema sports ministry-i Bajrang aser Vinesh Phogat na nem nongloktsüogo, ajisüaka tang tatalokba apir tenati iba mapa nongloktsüba nung shilem magi atatsü ta

shiego. Bajrang-isa, media kari WFI tir, Brij Bhushan Sharan Singh, shiba sexual harassment dak sendakba nung aija lir, pa pusemba atema mepelaba lemsatepogo aser ashiba agi, nisung kari iba longkak aitba sentong ya raksatsütsü meranger.

"Pa indang criminal record repringang; iba dak sendakba nung kecha tasüngdangtsü mali. Onoki linük atema gold medal bener arutsüba mapang iba dak sendakba nung ken o ashishir," ta pai ashi.

"Nisung kari iba ya yimden yimsüsüba ken o kümdakja lenmang balakati anir aotsü meranger," ta pai shisem.

Bajrang-isa, federation azüoktsü atema wrestler temi longkak aiter ta ashiba aitsüogo.

"Federation azüoktsü atema onok longkak aiter ta pai (Brijbhushan) jembia arudar. Federation tir mesüra mapa kar danga aginüra state wrestling federation nung mapa kabosa bener alitsüla," ta Bajrang-i rasa ashi.

Brij Bhushan-i taoba mapang, tir ka meshim tashi pai iba mapa bena atatsü ta shiego.

"Pai pa election nung metokteptsü ta shia arudar, saka pa küm 12 abensaogo aser toktepnüyonga metokteptetsü," ta Bajrang-i ashi.

Arishi küm 26 tain asayar yagisa, Brij Bhushan-i par kinunger kar ajanga federation nung maneni shilem agitsü merangba indang jembia liasü.

Brij Bhushan'er jabaso, Karan Bhushan Sharan Singh ya WFI indang vice president aser Uttar Pradesh Wrestling Association indang senior vice president liasü.

"Par kinungertemi UP aser Bihar nung wrestling asaya amokbaner aruogo. Pai 'pariwaarvad' dak sendakba nung onok aitsür ajisüaka paiang iba nung shilem agir," ta Punia-i ashi.

### MVA High Performance Athletics Meet nung Murali-i Gold angu

**Monupii/May 1, 2023 (Agencies):** India nunger long jump asayar Murali Sreeshankar-i Chula Vista, USA nung asayaba MVA High Performance athletics meet 1 nung gold medal nguogo. Pai meter 8.29 jokteta liasü.

Iba season nung pa tang agi tanabuba asayamung nung shilem agia liasü aser paia 0.07m agi dang taoba küm 8.36m jokteter aliba memenepi liasü, koba pa indang career nung tang tashi nung tajungtiba asütsü. Arishi küm 24 tain asayar yagi 2022 Commonwealth Games nunga silver medal ngur lir.

Iba asaya nung China nunger asayar Ma Weidong-i meter 7.99 jokteta silver angu aser China nungersa Huafeng Huang-i meter 7.61 jokteta bronze medal ngua liasü.

World Athletics Championships 2023, koba Budapest nung August ita asayatsü lir iba asayamung atema qualifying standard ji 8.25m lir aser Sreeshankar-i iba qualifying standard ajangetetogo, ajisüaka iba ya mezüngshitsü kechiyong mopung limit dang nungi tali liasü.

Maximum permissible wind speed ji +2 m/s asütsüla ajisüaka Sreeshankar indang wind speed 3.1m/s liasü.

Sreeshankar-i, iba ita tetenzüklen Bengaluru nung Indian Grand Prix asayaba mapang meter 7.94 jokteta liasü.

Sreeshankar-i, meter 8.36 jokteta India nung men's long jump national record yanglur liasü ajisüaka iba record ya Jeswin Aldrin-i ajatetogo, shibai March ita tanabuba Indian Open Jumps Championships nung meter 8.42 jokteta liasü.

**BIEMDANGANG**  
"Sobaliba samara maitüsü samatsü."